



PRIMEIRO
MINISTRO

**MENSAJEM
SUA EXSELÊNCIA PRIMEIRU-MINISTRU
DR. RUI MARIA DE ARAÚJO
IHA OKASIAUN KOMEMORASAUN
LORON INTERNASIONAL FAMILIA**

**Largu Lecidere, Díli
16 fulan Maiu tinan 2015**

Sr. Presidente da Republika, Eselénsia
Sra. Primeira Dama, Eselénsia
Sr. Vice Presidente do Parlamentu Nasional, eselénsia
Sr. Presidente Tribunal do Rekursus, eselénsia
Senhores Membrus do Governu, Senhores Deputadus
Membrus do Corpu Diplomátiku
Familia tomak ne'ebé ohin mai halibur iha ne'e,

Bom dia ba ita hotu.

Hau hatene katak ita hotu kolen, maibé ita halo lai viva (um aplauso) ida lai
"Viva Família Timor-Leste"

Uluk nia nain hakarak agradese Sra. Primeira Dama tamba iniciativa murak, hodi dinamiza no organiza prosesu atu selebra ba dala uluk liu Loron Internasional Familia nian iha Timor-Leste, no hakarak liu-liu mos agradese Sua Eselénsia Sr. Presidente da Republika ba iniciativa, atu hamutuk konvida ita bo'ot sira hotu, hodi partisipa iha selebrasaun ida ne'e.

Hanesan ita rona tiha ona iha S.E. Sr. Presidente da Republika ninia mensajen horiseik, Assembleia Jeral NU desidi atu hamosu loron internasional familia iha tinan 1993, no iha fatin barak iha mundu, hahu selebra tinan-tinan hahú kedas 1994, ho objetivu atu salienta aspetu importante lubun ida iha aspetu iha moris familia sira nian iha mundu rai klaran, no mós fó valor hotu hotu ne'ebé família iha rai klaran komunga.

Iha selebrasaun Loron Internasional Familia tinan 2015 nian, Nasoens Unidas hili tema, liu husi pergunta ida hanesan tuir mai ne'e: **"Mane maka manda? Igualdade Jeneru no Direitu Labarik nian iha familia kontemporánea nia laran"**. Tema ida ne'e hamosu ho intensaun atu fokaliza mundu ninia atensaun ba **mane hotu hotu ninia papel iha igualdade jéneru no igualdade direitu labarik sira nian, iha familia nia laran**. Igualdade jéneru tenki hahu iha uma laran, no mane sira bele iha papel importante ida hodi garante igualdade iha distribuisaun papel no funsoens iha uma laran.

Tuir kontestu Timor-Leste nian, hau hakarak konvida ita atu hodi haree didiak liu tan papel mane nudar aman, iha igualdade generu iha familia nia laran. La iha métodu ne'ebé eficiente atu hanorin oan sira kona-ba igualdade jéneru duke sai ezemplu ba ita oan sira. Ita bele koalia teoria too ne'ebé, maibé **lisaun ne'ebé ita nia oan sira aprende diak liu, maka ita nia ezemplu rasik**. Tan ne'e, se ita hakarak hamosu igualdade iha ita nia sociedade, hanesan ita hakilar beibeik ona, Aman sira iha familia ida-idak nia laran, tenki hatudu ezemplu iha distribuisaun servisu iha uma laran, entre feen ho la'en, no moos entre oan sira. Uma kain rasik, familia rasik tenki moris iha igualdade, se ita hakarak dezigualdade atu lakon iha sociedade nia laran. Ne'e signifika, la'os feto deit maka tein, fase bikan, kuru be'e, fase rupa no hamoos uma-laran, maibe signifika moos, katak la'os mane deit maka hamoos toos, halai natar ka profissaun seluk.

Iha aspetu igualdade direitu labarik nian signifika mane nu'udar aman iha familia, bele halakon toman a'at uluk nian, ne'ebé, liu-liu sei nafatin mosu iha foho, iha area rural sira,

wainhira la iha possibilidade atu haruka oan sira hotu ba eskola, prefere husik hela oan-feto sira iha uma, no haruka oan-mane sira maka ba eskola, ka prefere oan-feto sira lalika eskola boot, tanba husik atu hola mane sedu deit.

Tempu too duni ona atu iha familia nia laran, mane sira muda rumu ka diresaun husi dezigualdade género no dezigualdade iha direitu labarik sira ne'ebé iha familia nia laran, hodi nune'e ita bele hakat lai's liu tan ba moris diak iha Nasaun ida ne'e.

Eselensia,
Señora no Señor sira,

Loron Internasional Familia ninia objetivu maka promove aspetu espesifiku iha moris familia nian iha mundu rai klaran, no iha tinan 2015, Loron Internasional Familia hakarak salienta Mane sira ninia papel iha igualdade jeneru no igualdade direitu labarik sira iha familia nia laran. Konserteza tinan oin, sei salienta fali aspetu seluk no sei buka foo hanoin nafatin ba ita, buat hirak ne'ebé murak ba familia sira nia moris.

Tan ne'e, kae'r tuir ba inisiativa murak husi Señora Primeira Dama no Señor Presidente da Republika, Governu sei nafatin foo apoiu atu tinan-tinan ita celebra loron ida ne'e, hodi lori mai ita nia oin, tema hirak ne'ebé afeta, no iha interesse ba ita nia familia tomak. Tinan ida ne'e, Governu liu husi Ministeriu Administrasaun Estatal, husu ba Administrasaun Munisipiu sira hotu atu halo mós Marcha da Familia surante oras ida ka rua nia laran iha Munisipiu ida-idak, horiseik, dia 15 de Maio.

Ohin ita lao mai hau husu ba Vise Ministru Administrasaun Estatal, relata dehan iha Munisípiu hotu hotu, horiseik sira halao marcha durante oras ida nia laran, hafoin hotu tiha, sira hotu hamutuk halo limpeza iha kintal Munisípiu nian. Inisiativa sira hanesan ne'e, ita sei buka halo iha tinan oin mai. Tinan oin, ita presiza organiza ho antesendencia liu, no moos ho envolvimentu bo'ot liu tan.

Tinan oin Munisípiu Díli mak teni asumi responsabilidade atu hamutuk ho Gabinete Primeira Dama ninian dinamiza prosesu selebrasaun Loron Internasional Familia nian.

Enkuantu ida ne'e, Governu sei buka moos haka'as-aan tan, atu **tau familia nu'udar sentru ba program dezentvolvimentu ne'ebé hala'o iha Timor-Leste nia laran**. Ita iha tendensia atu fokaliza ita nia programa ka projetu dezentvolvimentu ba deit elementu balun husi familia, hanesan fo apoiu ba inan liu husi bolsa da mãe, ka apoiu merenda eskolar, ka moos programa espesifiku ba inan no labarik sira. Sorti seidauk mosu tan programa bolso do pai, ka programa espesifiku ba mane ka aman sira deit, tamba se ida ne'e mak mosu duni karik, ita 'balkaniza' ka ita fahe tiha familia ne'e ba pedasuk lubun ida, ka hanesan moos ita 'separa' ka ita mak 'divorsia' familia sira, liu husi programa sira ne'e.

Ita tenki reorienta ita nia programa ka projetu sira, atu **apoia familia nu'udar nukleu de atensaun principal iha sociedade nia laran**, hodi nune'e liu husi familia, ita bele moos atingi ninia elementu ida-idak, hanesan labarik/oan sira, feto ka inan sira, no mos mane ka aman sira. Estadu, liu husi Governu, sei **hamosu kondisaun atu familia no sira familia**

ida-idak bele dezenvolve sira nia a'an, hodi bele sai forti, no ikus mai haforti moos ita nia nasaun.

Iha aspetu ida ne'e Governu hahu ona ho **Program Saude iha Familia**, nu'udar forma ida atu implementa atensaun primaria saude iha comunidade nia le'et, hodi tama liu husi familia nu'udar nukleu ba atensaun saude. Ita hein katak wainhira ita celebra Loron Internasional Familia iha tinan 2016, husi inisiativa ida ne'e, familia balun iha nasaun ida ne'e nia laran, bele hetan daudaun ona atensaun primária saude liu husi forma integrada ida, nu'udar nukleu iha ita nia sosiedade nian laran. Dadus estatístiku ita nian hatudu katak iha Timor laran tomak ita iha 167 mil famílias iha Kapital Díli deit, ita iha kuarenta e oito mil famílias ne'ebe moris iha capital ne'e. Se ita reorienta ita nia atensaun ba núkleo familiar, hau nia hanoin ita sei bele hetan rezultadu diak liu, husi ita nia programa dezenvolvimentu.

Atu remata, hakarak agradese moos ita boot sira hotu nia partisipasaun, no moos serbisu ne'ebé komisaun organizadora hala'o hodi lori ita mai to'o iha celebraun ida ne'e.

Hau halo votus liuliu atu familia sira iha Timor-Leste nia laran tomak celebra hodi halo moris familia ninian, bele hahú hatene daudaun ona, katak 15 de Maiu, loron ida ne'ebé mundu dedika ba FAMILIA sira hotu, loron ida ne'ebé FAMILIA hotu iha direitu no dever, atu celebra hamutuk ho familia seluk iha mundu rai klaran.

Hau halo votus liuliu mos atu FAMILIA ida-idak iha Timor-Leste nia laran, celebra loron ida ne'e hodi hala'o moris familia nian ho DOMIN no FIDELIDADE, la'os deit iha 15 de Maiu, maibe hahu kedas 1 de Janeiru to'o 31 de Dezembru, tinan tinan enkuantu Maromak sei fó vida ba ita.

Obrigadu barak ba ita boot sira hotu nia atensaun.

Dr. Rui Maria de Araújo
Loron 16 fulan Maiu tinan 2015